

INSTRUCCIÓN POLA QUE SE ESTABLECE O CRITERIO INTERPRETATIVO EN RELACIÓN Á APLICACIÓN DO FACTOR DE CORRECCIÓN PREVISTO NO ARTIGO 47.3 DA CONVOCATORIA DE AXUDAS DO PROGRAMA FÁBRICA DO FUTURO, FÁBRICA INTELIXENTE E SOSTIBLE DA INDUSTRIA 4.0 (IN852A)

Por resolución do 14 de agosto de 2020 da directora da Axencia galega de Innovación (DOG núm. 173, de 27 de agosto 2020), modificada pola Resolución do 27 de novembro de 2020 (DOG núm. 241, de 30 de novembro de 2020), establécense as bases reguladoras para a concesión, en réxime de concurrencia competitiva das axudas para o programa Fábrica do futuro, fábrica intelixente e sostible da industria 4.0 (cuarta convocatoria), orientado a proxectos de investigación industrial, desenvolvemento experimental e innovación centrados en tecnoloxías industriais innovadoras dentro da iniciativa Industrias 4.0- captación de investimentos, cofinanciadas polo Fondo Europeo de Desenvolvemento Rexional (Feder) no marco do programa operativo 2014-2020.

O artigo 47 destas bases reguladoras regula a gradación de incumprimentos e no seu apartado 3 establece o seguinte:

«3. Por afectar as condicións que se tiveron en conta no momento de conceder a subvención, nos seguintes casos de incumprimento reducirase a intensidade da axuda do seguinte xeito:

a) No caso de que o custo total do proxecto finalmente xustifico sexa inferior ao orzamento mínimo subvencionable (2.000.000 euros) reducirase a axuda aplicando o seguinte factor de corrección: $Fc=1-X^2/3600$, onde X é a porcentaxe deixada de xustificar sobre o custo concedido. No caso de proxectos en cooperación, X é a porcentaxe deixada de xustificar por cada un dos membros da agrupación sobre o custo que lle foi concedido.

b) Se o custo xustifico finalmente por algunha entidade beneficiaria é inferior á participación mínima esixida para os proxectos en cooperación:



- No caso de colaboración efectiva entre empresas, (alomenos unha das cales debe ser peme), cando unha das empresas asuma máis do 70% dos custos subvencionables descontarase unha porcentaxe do 15% de axuda adicional.
- No caso de colaboración efectiva con organismos de investigación, a súa achega non pode ser inferior ao 10%, polo que se fose inferior descontarase a porcentaxe do 15% de axuda adicional.
- No caso de empresas, a súa achega non pode ser inferior ao 10% do custo total subvencionable do proxecto, polo que se fose inferior reducirase o 10% da intensidade da axuda.

No caso de proxectos de innovación en materia de organización e procesos solicitados por grandes empresas, a participación das pemes coas que colabora deberá ser como mínimo do 30% dos custos subvencionables totais do proxecto en cooperación. Se a achega é inferior ao 30% o reintegro será total.

c) Se o custo xustificado finalmente na partida de persoal de nova contratación fose inferior á contía concedida nesta partida, reducirase a axuda aplicando o seguinte factor de corrección: $F_c = 1 - X^2/3600$, onde X é a porcentaxe deixada de xustificar sobre o custo que lle foi concedido nesta partida.

d) Se se tivese incumprido a obriga de dar publicidade ao financiamento do proxecto consonte ao establecido nesta resolución, ou a obriga de comunicar a obtención doutras axudas para a mesma finalidade ou os mesmos custos, aplicarase un factor de corrección do 0,95.

e) Se se tivese incumprido as tarefas, compromisos, obxectivos ou condicións do proxecto, dando lugar a un informe final negativo, o incumprimento valorarase en función deste e supoñerá a aplicación dun factor de corrección igual á porcentaxe de incumprimento sinalado no informe técnico. Se esta porcentaxe é superior ao 50% considerarase como incumprimento total e dará lugar ao reintegro da totalidade da axuda.

A concorrencia de distintas causas de incumprimento dará lugar á apreciación conxunta destas, aplicando á intensidade da axuda o factor que resulte do produto de todos os



factores de corrección. No caso de que algún dos factores de corrección sexa negativo, a intensidade da axuda será cero.

A aplicación do factor de corrección realizarase na última anualidade, e o importe minorado detraeráse desta. No caso de que o importe aprobado para a última anualidade resulte insuficiente para cubrir esta diferenza, requirirase á entidade beneficiaria para que proceda á devolución dos fondos percibidos indebidamente. A falta de devolución destes nos prazos requiridos dará lugar á incoación de expediente de reintegro nos termos recollidos no artigo 33 da Lei 9/2007 e no título V do Decreto 11/2009.»

O artigo 14.1 da Lei 9/2007, de 13 de xuño, de subvencións de Galicia dispón que:

«Sen prexuízo de que o Consello da Xunta determine os criterios básicos, os órganos concedentes establecerán con carácter previo á disposición dos créditos as bases reguladoras aplicables á concesión.

As citadas bases serán obxecto de publicación no Diario Oficial de Galicia e na páxina web do órgano concedente e conterán, como mínimo, os seguintes extremos:

n) Criterios de gradación de posibles incumprimentos de condicións impostas con motivo da concesión das subvencións. Estes criterios resultarán aplicables para determinar a cantidade que finalmente deba percibir o beneficiario ou, se é o caso, o importe que vai reintegrar, e deberán responder ao principio de proporcionalidade.»

Por outra banda, o artigo 33.2 da Lei 9/2007, ao regular as causas de reintegro, determina que cando o cumprimento por parte do beneficiario ou, se é o caso, pola entidade colaboradora se aproxime de modo significativo ao cumprimento total e se acredite por estes unha actuación inequivocamente tendente á satisfacción dos seus compromisos, a cantidade a reintegrar virá determinada pola aplicación dos criterios enunciados no artigo 14 do mesmo texto legal.

A normativa vixente impón, polo tanto, que debe existir proporcionalidade entre o incumprimento e a medida a adoptar, polo que é necesario establecer un criterio interpretativo para a aplicación do factor de corrección previsto no artigo 47.3 das bases



reguladoras. Este criterio permitirá determinar, de forma proporcionada, a cantidade a reintegrar ou, no seu caso, declarar a perda do dereito ao cobro da subvención naqueles casos nos que se produza un incumprimento por parte das entidades beneficiarias que afecte á partida de persoal de nova contratación.

En virtude do anterior, e de conformidade co establecido na disposición derradeira primeira das bases reguladoras para a concesión de axudas do programa Fábrica do Futuro, Fábrica intelixente e sostible da Industria 4.0, que faculta á directora da Axencia Galega de Innovación para que leve a cabo as actuacións que sexan precisas para o desenvolvemento e aplicación desta convocatoria dito a seguinte

INSTRUCCIÓN

O alcance do factor de corrección previsto no artigo 47.3 letra c) limitase, exclusivamente, á partida afectada polo incumprimento.

Naqueles supostos nos que o custo xustificado finalmente na partida de persoal de nova contratación fose inferior á contía concedida nesta partida, reducirase a intensidade da axuda concedida nesta partida aplicando o factor de corrección $F_c = 1 - X^2/3600$ onde X é a porcentaxe deixada de xustificar sobre o custo que lle foi concedido nesta partida.

En coherencia co anterior, cando conorra a causa de incumprimento do artigo 47.3 letra c) coas demais previstas no mesmo artigo, o factor que resulte do produto de todos os factores de corrección aplicarase unicamente á intensidade da axuda correspondente á partida afectada polo incumprimento. Nos casos nos que algún dos factores de corrección sexa negativo, a intensidade da axuda na partida afectada polo incumprimento será cero.

A directora da Axencia Galega de Innovación

Patricia Argerey Vilar

